

կազգարարէ՝ տակաւ առ տակաւ մեզ շրջապատող լեռներու բարձր մասերն սպիտակ սաւանով քողարկուելով՝ որ մեր հորիզոնը բոլորովին սպիտակի պիտի տեսնեմք:

Ճիւնը օր ըստ օրէ լեռներէ ի վայր կը խոնարհի, հիւսիսային հովն հետզհետէ կըսկսի սաստկանալ, դաշտային բնակչաց ևս սպառնալիք կարգալ:

Բագրեանդցին իւր փասա փուսէն ներս հաւաքելու վերայ է, ամեն կողմն մեծ իրարանցում կայ, ամբողջ 7 ամսուան ձմեռ մի կը սպառնայ իւրեն, որ պիտի շղթայէ զինք, ամրապինդ կապէ:

Նա զայս կը գուշակէր արդէն, իւր և անասնոց ամեն պիտոյքն հոգաց, մի կողմէ թերի մնացած գործերն կարգադրելու հետ է և միւս կողմէ Խալեազ, Ղլիճ կետուկ, Ալատաղ, Սինագ և Քօսատաղայ կը նայի թէ ձիւնը ինչ վիճակի մէջ է:

Հոկտեմբերի վերջերն ձիւնը հազիւ լեռներու կիսէն վայր իջած էր, մենք ապահով ենք, կարող ենք գուշակել որ մինչև Նոյեմբերի վերջերն հազիւ սպիտակ քօշն լեռներու ստորոտն իջնայ, ապա դաշտն մտնէ:

Սակայն հազիւ Նոյեմբերից մի քանի օր անցած է կամ չէ, մի օր յանկարծ առաւօտուն տեսար որ ամբողջ Բագրեանդայ հորիզոնի մէջ գտնուած ամեն բան, ամեն վայր, կաթնադոյն քողը հագած է, ճանապարհներ, գիւղեր աննշմարելի դարձած են, միայն կերևին լեռներ՝ գետեր, քիչ օր անցնելէն յետոյ նաև կը նշմարուին գիւղեր սև բծերու նման, անոր համար որ տներու տանիքներն աւելած են, որպէս զի ձիւնը հալելով ներս չը թափանցէ, որով սևացած կերևի:

Նոյեմբերի տասն և հինգ չենք հասած, ձեան խաւը հետզհետէ թանձրացած է, սակայն դեռ այս այն կողմն կենդանութեան հետքեր կերևին, դաշտի մէջ ձիւնը ճեղքելով երթևեկող մարդիկ սև սև կերևին, դեռ վազուն ջրերու ճանապարհներն աչքի կը զարնեն:

Պարզ գիշեր մի յանկարծ հիւսիսային սառը հովը փչեց, ջրերը սառեցնելով որոց ընթացքը կասեցոյց, սակայն դեռ գետոց ընթացքը կը նշմարուի, տեսար որ աւելի սաստիկ հով